

## Høringsuttale NOU 2012:6 Arbeidsretta tiltak

13.07 2012

### **Innleiing**

Arbeidsdepartementet har oversendt «NOU 2012:6 Arbeidsrettede tiltak» på høyring, med frist til 13.07.12 til å gi uttale til utreiinga.

Askvoll kommune er samd i Brofoss utvalet sitt ynskje om å styrke arbeidsmoglegheitene for personar med nedsett arbeidsevne. Vi støttar utvalet i behovet for å auke innsatsen ovanfor desse målgruppene. Det er etter vår oppfatning heilt naudynt, dersom vi skal lykkast med å få fleire ut i arbeidslivet.

Utvalet er delt i si tilråing av framtidig organisering av arbeidsretta tiltak og har framsett framlegg til tre ulike modellar. Vi oppmodar difor om at det vert utarbeidd ei stortingsmelding, der Regjeringa klargjer sine ynskje. Dette vil gi eit betre grunnlag for å treffe den beste slutninga.

Askvoll kommune støttar ein kombinasjon av modell 1 og modell 2. For kommunar som har geografisk stor avstand til næraste vekstbedrift, må det leggjast til rette for bruk av ordinært arbeidsliv, jf modell 2.

### **Høringsuttale**

Fjaler kommune er eigar av aksjeselskapet og vekstbedrifta Vevang Produksjon. Verksemda leverer tenester til nærliggande kommunar i Hafs-regionen. Det er difor naturleg at «NOU 2012:6 Arbeidsrettede tiltak» får merksemd i tilgrensande kommunar som Askvoll.

Vevang Produksjon leverer tiltaka VTA og APS til NAV. Tiltaka inngår i ei rammeavtale mellom verksemda og NAV Sogn og Fjordane. I 2011 vart verksemda equass-sertifisert og har kvalitetssikra dei sosiale tenestene verksemda har. Verksemda har eksistert i over 20 år og har opparbeidd erfaring og god kompetanse på tilretteleggingar i arbeidslivet.

EU-undersøkingar viser at Noreg ligg på topp når det gjeld transaksjonskostnader. Tiltaket «avklaring» i skjerma verksemd, som vert betalt med rammetilskøt har vist seg å vere rimelegare enn når same tiltaket har vore ute på anbod og betalast pr time.

Ei framtidig oppfylgning gjennom modell 3 i NOU, vil kunne bygge ned kompetansen etablerte verksemdar som Vevang Produksjon AS i dag har. Konkurransetsette tenester vil kunne vere meir sårbare for rekruttering av tilsette i HAFS-regionen.

Den kommunale eigarskapen er ei styrke for attføringsarbeidet, og sikrar langsiktig planlegging, stabilitet både i rammer og tenesteinnhald og legg gjennom dette til rette for vekst og utvikling.

Gjennom ein kombinasjon av modell 1 og modell 2, med stabilitet i rammer og tenester, vil Vevang Produksjon AS levere best mogleg tenester til innbyggerane i regionen. Samtidig vil ein gjennom ordinært arbeidsliv gi eit tilbod der det er lang avstand til næraste vekstbedrift.

Modellen fylgjer kjerna i det systemet vi har i dag og fokuserer på tidleg intervensjon i attføringsarbeidet, heilskaplege tiltak der ventetidene vert reduserte, endringsprosessar hos brukar og i arbeidslivet for å inkludere fleire menneske. Metodikken og kompetansen hos tiltaksarrangør vert styrka. Modellen legg til rette for at både vekst-attføringsbedriftene og NAV reindyrkar rollene sine.

Modell 2 føreset at næringslivet er «klare til» å ta over attføringsarbeidet. Val av modell 2 vil kunne føre til avvikling av vekst-og attføringsbedrifter og gjennom dette fråta mange menneske med nedsett arbeidsevne, ein arbeidsstad dei trivast på. I kommunar med lang geografisk avstand til vekstbedrifta, vil modell 2 vere eit alternativ under føresetnad av at det ikkje svekkar næraste vekstbedrift.

Sogn og Fjordane er eit fylke med låg arbeidsløyse, samanlikna med resten av landet. Likevel fell nærare 1 av 3 menneske ut av yrkeslivet av ymse grunnar. Askvoll kommune ynskjer å tilrettelegge for vekstvilkår for attføringsarbeidet lokalt, slik at innbyggerane i regionen få gode tenester òg i framtida.

Askvoll kommune støttar eit samla utval i synet om at meir av attføringa skal føregå i ordinært arbeidsliv. Attføringsarbeidet må utførast av menneske med naudsynt attførings- og inkluderingskompetanse.

Etter vår mening bør NAV framleis ha rolla som avklarande, kontrollerande og oppfylgjande instans og styrke samarbeidet med vekst-og attføringsbedriftene, slik at attføringsarbeidet vert til det gode for innbyggerane i regionen.

Askvoll kommune  
v/ordfører Frida Melvær

